

蕩香零拾叢書



元河南志卷三

成

後魏城闕古蹟

後魏京城亦在成周門十二

按後趙石虎建武十一年司豫荆兗二十六萬人城洛陽宮至後魏門有三道孝文帝太和十七年幸洛陽周巡故宮基跡遂詠黍離之詩爲之流涕乃定遷都詔司空穆亮與尚書李冲將作大匠董爵經始洛京又命青州刺史劉芳中書舍人常景造洛陽宮殿門闔之名經途正其號十九年九月新都始立於是六官文武盡遷洛陽宣武永平二年又詔定諸門闔名初命中書舍人沈馨以隸書書板題之景明正始之年又敕符節令江式以大篆易之

南有四門東曰開陽門次西平昌門次西宣陽門次西

津陽門東有三門南曰青陽門

晉之青明門孝文改亦曰稅門又曰芒門

中曰東陽門北曰建春門西有四門南曰西明門

漢之廣陽門孝文改

次北西陽門

晉之西明門孝文改舊門在東南邪出孝文徙對東陽門

次北闔闔門

北舊徙門稍南

次北承明門

遷京之始宮闕未就孝文帝徙金墉城城西有王南寺數臨幸焉因開此門當金墉城前東西大道而未有名時人謂之新門羣臣常逆帝於新門帝謂御史中尉李彪曰曹植詩云謁帝承明廬此門當以承明

爲稱

北有二門東曰廣莫門

自廣莫至大夏宮觀相連

西有大夏門

宣武造三層樓去地二十丈洛陽城門樓皆兩重去地百尺唯大夏門葢棟峻麗

宮室

按宮殿多仍魏晉舊名或云依洛陽圖修繕某所某居疑總名閭闔宮然又與上門名相犯

閭闔門闕

閭闔門外挾

大司馬門 端門 止車門 朱華門 乾明門 雲

龍門

宮東門

神虎門

宮西門

千秋門

宮西門西對閭闔門

東掖門

西掖門

大極殿

宣武景明三年成

式乾殿

徽音殿

顯陽殿

宴道武以來宗室於此殿

宣光殿

劉騰廢靈太后於此殿

明光殿

莊帝誅爾朱榮之所

理訴殿

宣武延昌元年立理訴殿申訟甌以盡冤窮之理

清暑殿 觀德殿

宴射之所

光極堂 宣極堂 清徽堂 西柏堂 凝閑堂

胡太后置鐘於此堂

茅茨堂

後魏書任城王澄從高祖於觀德殿高祖曰躬以觀德次之凝閑堂高祖曰名要有其義此堂天子閑居之義不可縱奢以忘儉自安以忘危故此堂後作茅茨堂謂李冲曰此東曰步元廡西曰遊凱廡此坐雖非唐堯之君卿等當無愧於元凱

東堂 含溫堂 聽訟觀

宣武永平元年詔依洛陽舊圖修

流化池

取乾道曲成萬物無滯之意

洗煩池 京師東西二十里南北十五里

廟社宮室府曹以外方三百步爲一里里開四門置里正二人吏四人門士八人總二百二十里按城之大小見上文而陽街之增廣而言者蓋兼城之外也又按宣武景明二年發畿內夫五萬五千人築京師三百二十三坊四旬而罷蓋廣陽王嘉所請云京四面築坊三百二十各周一千二百步

太尉府

在閭闔門南永甯寺東西對永康里卽舊銅駝街其左是魏晉故廟地水經注曰自此南直宣陽門經緯通達皆列馳道往來之禁一同兩漢凡官寺里名居第惟舉載於書者

昭元曹

大尉府南

御史臺

太尉府北

左衛府

在閭闔門前御道東

司徒府

左衛府南

大將軍高肇宅

司徒府東

國子學

司徒府南

宗正寺

國子學南

太廟

宗正寺南

護軍府

太廟南

衣冠里

護軍府南

右衛府

御道西

太府寺

右衛府南

將作曹

太府寺南

太社

將作曹南

司州

太社南

陰里

司州南四朝藏冰處

尚書省 延年里

在西陽門內御道北卽晉時金市北有濛汜池夏則有水冬則竭

司空劉騰宅 太僕寺

劉騰宅東

乘黃署

太僕寺東

武庫署

卽魏相國司馬文王府庫也在乘黃署東東至宮門

永康里

在西陽門內御道南

領軍將軍元乂宅

穿故井得石銘是漢太尉荀彧宅

義井里

在永康里東里北門外叢樹下有甘井石槽鐵罐以
給行人

司空府

在太倉南

太倉署

在東陽門內道北

導官署

太倉署西

治粟里

導官署南里內倉司官屬居之

宜壽里

治粟里西

中書侍郎王珣宅

晉有中書監荀勗宅又有侍中石崇宅宅有園池

永和里

在清陽門內御道北

里內有太傅錄尚書長孫稚右僕射郭祚吏部尚書邢
鸞廷尉卿元洪超衛尉卿許伯桃涼州刺史尉成興宅
皆朱門華屋當時名爲貴里乃漢董卓宅地里南北
皆有池卓之所造魏時猶有水冬夏不竭掘地者輒
得金寶邢鸞家嘗掘得丹砂及錢數十萬銘曰董太
師之物後夢卓索之鸞不與經年鸞卒

句盾典農籍田三署

建春門內御道南

司農寺

籍田署南

御道北有空地擬作東宮

卽晉之太倉

步廣里 蒼龍海

太倉西南卽翟泉也其周三里水猶澄清洞底明靜
魚鼈鱗甲皆可辨孝文以翟泉在華林園東因名爲
蒼龍海

河南尹廨

翟泉之北

永安里

不知其所

齊王蕭寶寅宅

右城內

宣陽門外一里御道東曰利民里

里內有靈臺舊基漢光武建者東有辟雍魏武建者

明堂

宣武八年詔建孝明正光中始成在辟雍之西南上圓下方八窗四闥

開陽門外三里御道東曰勸學里有太學

里內有漢太學學堂前石經春秋尙書二十五碑表裏刻之存十八碑復有四十八碑隸書周易尙書公羊禮記四部又讚學碑一魏文典論碑六至太和十七年猶有四碑孝文題爲勸學里太學宣武時方成至東魏孝靜帝武定四年遷石經於鄴

延賢里

在勸學里東有尙書令王肅宅肅爲南齊祕書丞奔魏時孝文新營洛邑凡所造制肅博識舊事大有裨益孝文重之因名其里曰延賢

宣陽門外四里至洛水浮橋

號永橋神龜中常景爲銘南北兩岸有四華表舉高二丈上作金鳳凰

永橋以南員邱以北

按後魏書宣武景明二年築園邱於伊水之陽伊洛之間夾御道東有四夷館

一曰金陵二曰燕然三曰扶桑四曰崦嵫

西有四夷里

一曰歸正二曰歸德三曰慕化四曰慕義

金陵館歸正里

吳人投魏者處金陵館三年以後賜宅歸正里宣武景明初齊建安王蕭寶寅奔魏封會稽公築宅歸正里後晉爵齊王尙南陽長公主寶寅恥與夷人同列令公主啟帝求入城乃賜宅永安里又張景仁者與寶寅同至拜羽林監亦賜宅此里民間號吳人坊里

近伊洛二水三十餘家自立巷市所賣多水族時人謂之魚鼈市景仁亦恥之遂徙居孝義里孝明正光四年梁武帝子西豐侯蕭正德來奔處金陵館爲築宅歸正里後正德以宅建歸正寺

燕然館歸德里

北夷來附者處燕然館三年以後賜宅歸德里正光中北夷郁久閭阿郝肱來朝處之燕然館賜宅歸德里北夷入侍者常秋來春去避中國之熱時人謂之雁臣

扶桑館慕化里

東夷來附者處扶桑館賜宅慕化里

崦嵫館慕義里

西夷來附者處崦嵫館賜宅慕義里

四通市

四夷慕化之民萬餘家別立市於洛水南號四通市
民間謂爲永橋市伊洛之魚多於此賣魚味甚美京
師語曰伊洛鯉魴貴於牛羊

永橋南道東有白象師子二坊

宣武永平二年乾陀羅國獻白象背設五采屏風七
寶坐牀容數人詔養象於乘黃曹象壞屋毀牆走出
百姓驚怖胡太后遂徙象於此坊又嚙噉國獻師子
亦畜此坊莊帝謂侍中李彧曰朕聞虎見師子馴伏
可覓試之乃詔近山州縣捕虎鞏縣山陽並送二虎
一豹見師子皆瞑目不敢仰視園中有一盲熊取試
之聞其氣驚怖曳鎖而走普泰元年節閔並令放還
山林

津陽門外御道西高陽王雍宅宅北中甘里

右城南